

BETO BANKENTO ME MONA YESU

Baleso 2 ya Paki



Merci na www.freebibleimages.org/YO! Ministry sambu na foto.

BETO BANKENTO ME MONA YESU –Baleso 2 ya Paki

(Bankento ya monaka Yesu na nima Yandi me fwa ti telama diaka)

Leso yai ke monika na Bible: Matayo 28:1-10; Marko 16:1-11; Luka 24:10, Yoane 20:1-18.

Kikuma sambu na Serie yai ya Baleso:

Na baleso yai, bana ta bakisa nde, na nima ya lufwa ti kutelema na Yandi, Yesu monikaka ntete na bankento. Yai ke songa nde bankento mpi kele mfunu kuzabisa nsangu ya Yesu Kristo. Ebuna, bana bankento ta sola kuzabisa nsangu ya Yesu, ti bana yonso ta yidika ntima nde ntangu bo kwela, bo fweti kwela kaka mukristo ya ngolo.

Bankunga ya kwenda nzila mosi ti baleso yai:

(Yonso na Mukanda ‘Bankunga ya Ecodim’ ya MCE)

Yesu imene telema

Yesu Kristo me telema

Mazono, Bubu, Mvu ya Mvu

Mo' Kwikila Bible

Mwana Nzambi Mene Kuma Awa, vs. 2

Baverse ya kulonguka sambu na Serie yai ya Baleso: Matayo 28:5-7

5 Wanzio tubilaka bankento nde: “Beno kuwa boma ve, sambu mono zaba nde beno ke sosa Yesu yina ya bo tulaka na zulu ya kulunsi.

6 Yandi kele awa ve, Nzambi me tedimisa yandi na lufwa mutindu yandi tubaka.

7 Beno kwenda kuzabisa balonguki na yandi nde: ‘Nzambi me tedimisa yandi na lufwa mutindu yandi tubaka.’ Beno kwisa kutala kisika ya yandi vandaka ya kulala.

Serie yai na nkufi:

Leso 1. Maria ya Magdala muntu ya ntete kumona Yesu na nima Yandi me telema. Yoane 20:1-18.

Leso 2. Bawanzio songa Maria ya Magdala, Maria, mama ya Yesu, ti Salome nde Yesu me telema, ti pesa bo kisalu kukwenda songa balonguki na Yandi. Matayo 28:1-10, Marko 16:1-11, Luka 24:10

Leso 1 na detail:

Maria Magdalena muntu ya ntete kumona Yesu na nima Yandi me telema.

Leso yai ke monika na Bible: Yoane 20:1-18.

Kikuma ya leso: Tala Kikuma sambu na Serie yai ya Baleso.

Baverse ya kulonguka sambu na Serie yai ya Baleso: Matayo 28:5-7 Tala introduction sambu na serie yai ya baleso.

Bankunga: Tala Bankunga ya kwenda nzila mosi ti baleso yai.

Kuyantika Leso:

Balonguki 12 ya Yesu solaka vandaka babakala yonso. Keti yai ke songa nde kisalu ya kuzabisa nsangu ya Yesu ikele kaka sambu na babakala? Bankento mpi vandaka kulanda Yesu, ti bankento ya nkaka sadisaka Yandi na kisalu na Yandi. Bubuyai beto zola kumona bankento na ntangu ya Yesu telemaka na lufwa. Beto yantika na mukanda ya Yoane, kapu 20.

Malungi ya nene na leso yai na bandambu 5:

1. Maria Magdalena muntu ya ntete kukwisa na maziamu na nima Yesu kufwaka. Yandi monaka nde bo me katula ditadi ya vandaka kukanga munoko ya Maziamu, ebuna yandi kwendaka kusonga Piere ti Yoane.

1A. Kutanga: Yoane 20:1-2

1 Na kilumbu ya lumingu na suka-suka mpenza, mpimpa vandaka me mana ntete ve, Maria ya Magdala kwisaka na maziamu, Yandi monaka nde ditadi yina vandaka na munoko ya maziamu, bo me katulaka yo.

2 Yandi kwendaka ntinu na Simoni Piere ti mulonguki yina ya nkaka ya Yesu vandaka kuzola. Yandi tubilaka bo nde: “Bo me katula Mfumu Yesu na maziamu, ebuna beto zaba ve kana bo me kwenda kutula yandi wapi.”

1B. Yula bana bonso yai:

- Na nima Yesu ke fwaka, nani kwendaka ntete na maziamu na Yandi?
(Maria ya Magdala kwendaka ntete—na lumingu na suka-suka yonso, na ntwala mpimpa vandaka kumana.)

- Maria monaka inki ntete?
(Ditadi ya nene ya bo me sadila kukanga munoko ya maziamu, bo me katula yo.)

- Yandi kwendaka ntete kusonga nani?
(Kusonga Simon Piere ti “mulonguki ya nkaka ya Yesu vandaka kuzola.” Bantu mingi ya zaba Bible, bo tuba nde Yoane vandaka mulonguki yina, kansi bonso yandi vandaka muntu kusonika mukanda yai, yandi zola ve kutuba zina na yandi.)
- Marie songaka Piere inki?
(Bo me katula mvumbi ya Yesu, ti bo zaba ve wapi bo me katula yo.)

1C. Kusonga inki me salama:

Bana yonso na kimvuka sala bonso bo me kuma na maziamu (bo tambula kaka sika bo ikele). Ya zole, bo tala nde ditadi kele kukanga maziamu diaka ve. Ya tatu, bo baka ntinu diaka (kaka na sika ya bo kele). Ya iya, bo songa Piere inki me salama.

1D. Kukina ti kuyimba.

Marie vandaka ntete kukuma na maziamu.

2. Piere ti Yoane kwisaka, ebuna bo monaka maziamu ya mpamba.

2A. Kutanga: *Yoane 20:3-10*

3 Piere ti mulonguki yina ya nkaka (Yoane), bo kwendaka kutala maziamu.

4 Bo vandaka kubaka ntinu bo zole nzila mosi, kansi mulonguki yina ya nkaka (Yoane)lutaka Piere na ntinu. Yo yina yandi muntu kwisaka kukuma ntete na maziamu.

5 Ntangu yandi niekaka sambu na kutala na kati, yandi monaka bilele ya mpembe na ntoto, kansi yandi kotaka ve na kati ya maziamu.

6 Ebuna Simon Piere kwisaka kukuma na nima, yandi kotaka na kati ya maziamu, Yandi monaka bilele ya mpembe yina vandaka na ntoto,

7 mpi lele yina ya bo tulaka Yesu na ntu. Yo vandaka sikamosi ve na bilele yina ya mpembe, kansi yo vandaka ya kukangama na ndambu ya nkaka.

8 Ebuna mulonguki ya nkaka yina (Yoane) kumaka ntete na maziamu, yandi kotaka mpi na kati. Yandi monaka mambu yina yonso, ebuna yandi kwikilaka.

9 Kansi bo bakisaka ntete ve mambu yina ya bo sonikaka na Mukanda ya Nzambi nde Nzambi nde Nzambi fweti tedimisa Yesu na lufwa.

10 Ntangu yai, balonguki yina zole vutukaka na nzo na bo.

2B. Yula bana bonso yai:

- Keti beno ke bambuka nde “mulonguki yina ya nkaka” vandaka nani?
(Yoane, muntu ya sonikaka mukanda yai)
- Na kati ya Piere ti Yoane ani kwisaka ntete na maziamu?
(Yoane kwisaka ntete.)
- Ntangu Piere kwisaka, yandi kotaka na kati ya maziamu ti yandi talaka inki?
(Bo talaka bilele ya mpembe na ntoto, ti lele ya bo me tula na ntu ya Yesu na ndambu ya nkaka yo mosi.)
- Na nima, Yoane mpi kotaka ti monaka bima yina. Inki vandaka mvutu na yandi na mambu yina?
(Yandi kwikilaka.)
- Ata bo monaka bima yai ti kwikilaka nde Yesu me telama, tii ntangu yina, bo bakisaka ve inki?
(Bo bakisaka ve nde yai yonso bamitubi ya Nzambi me sonika yo na Mukanda ya Nzambi nde yo fweti salama mutindu yina.

2C. Kusonga inki me salama:

Bana bakala zole lenda sala theatre kusala bonso Yoane ti Piere.

2D. Kukina ti kuyimba:

Yoane ti Piere monaka
Maziamu ya mpamba
Ebuna bo kwikilaka
Yesu me telama.

3. Maria me bikala na nganda, kudila. Ebuna yandi monaka bawanzio zole na kati ya maziamu.

3A. Kutanga: *Yoane 20:11-13*

11 Maria vandaka me telama penepene na maziamu, na nganda. Yandi vandaka ke dila. Ntangu yandi vandaka ke dila, yandi niekaka sambu na kutala na kati ya maziamu.

12 Yandi monaka bawanzio zole me lwata bilele ya mpembe; bo me vanda na kisika yina vandaka mvumbi na Yesu, mosi na ndambu vandaka ntu ya Yesu, mosi na ndambu vandaka makulu na yandi.

*13 Bawanzio yina tubilaka yandi nde: "Mama yai, sambu na nki nge ke dila?"
Yandi vutulaka na bo nde: "Bo me katula Mfumu na mono, ebuna mono zaba
ve kana bo me kwenda kutula yandi wapi."*

3B. Yula bana bonso yai:

- Maria vutukaka na maziamu. Yandi vandaka wapi?
(Penepene na yo, na nganda)
- Yandi vandaka kusala inki?
(Yandi vandaka kudila.)
- Ntangu Yandi niekaka kutala na kati ya maziamu, yandi monaka nani?
(Yandi monaka bawanzio zole na bilele ya mpembe.)
- Bawanzio yina vandaka kuvanda wapi?
(Sika Yesu vandaka kulala—mosi ya sika ya ntu na Yandi vandaka, ti mosi na sika
ya makulu na Yandi vandaka.)
- Bawanzio yulaka Maria inki?
(Sambu na inki nge ke dila?)
- Maria vutulaka inki mvutu?
(Bo me katula Mfumu na mono ti mono zaba ve bo me tula Yandi wapi.)
- Ntangu yina, yandi vandaka kuyindula nde inki me salama?
(Yandi vandaka kuyindula nde muntu me tula mvumbi ya Yesu na sika ya nkaka
ya yandi vandaka kuzaba ve.)

3C. Kusonga inki me salama:

Bana bankento yonso dila bonso Maria. Bo nieka, bo tala na kati ya maziamu.
Bana bakala zole vanda na sika bonso sika ya Yesu lalaka. Bo yula Maria (bana
bankento) sambu na inki bo ke dila. Bana bankento vutula bo mvutu.

3D. Yimba ti kina:

Maria vandaka kudila.
Yandi monaka bawanzio zole.

4. Maria balulaka ti yandi monaka Yesu kutelema kuna.

4A. Kutanga: *Yoane 20:14-16*

14 Ntangu yandi vandaka kutuba mambu yina, yandi balulaka na nima, ebuna yandi mona Yesu me telama pana, kansi yandi zabaka ve nde yai kele Yesu.

15 Yesu yulaka yandi nde, "Mama yai, sambu na nki nge ke dila? Nge ke sosa nani?" Maria banzaka nde ziku yai kele muntu ke salaka na mwa-mfinda yai. Yandi nde: "Tata, kana nge muntu katulaka yandi, songa mono kisika ya nge tulaka yandi, ebuna mono kwenda kubaka yandi."

16 Yesu tubilaka yandi nde: "Maria!" Maria talaka na ndambu yandi vandaka, ebuna yandi tubaka na ndinga ya Kiarami nde: "Rabuni!" (disongidila nde: "Longi!")

4B. Yula bana bonso yai:

- Ntangu Maria balulaka, yandi monaka nani?
(Yandi monaka Yesu.)
- Sambu na inki nge banza Maria zabaka Yandi ve?
(Mbala ya nkaka sambu meso na yandi me fuluka na mansanga.)
- Yesu yulaka yandi inki?
(Sambu na inki nge ke dila? Ngifula kiteso mosi bonso bawanzio yulaka yandi.)
- Maria yindulaka nde Yesu vandaka nani?
(Muntu ya kisalu ya mfinda)
- Inki ntangu Maria zabaka nde yo vandaka Yesu?
(Ntangu Yesu tubaka zina na yandi, "Maria.")
- Inki vandaka mvutu ya Maria?
(Rabuni! to longi!)

4C. Kusonga inki me salama:

Bana zole, mosi ya nkento ti mosi ya bakala, lenda sala bonso Yesu ti Maria kusonga inki me salama na ndambu yai ya histoire.

4D. Kuyimba ti kukina:

Maria monaka Yesu
Na meso na Yandi.
Kieleka Yesu me telama
Yandi monaka Yandi!

5. Yesu songaka yandi kusonga balonguki nde Yandi me telama ti Yandi fweti vutuka na Tata Nzambi.

5A. Kutanga: *Yoane 20:17-18*

17 Yesu tubilaka yandi nde: "Kusimba Mono ve, sambu Mono me tombuka na Tata ntete ve. Kansi kwenda na bampangi na Mono, tubila bo nde Mono ke tombuka na Tata na Mono, yina kele mpi Tata na beno; mono ke tombuka na Nzambi na Mono, yina kele mpi Nzambi na beno.

18 Maria ya Magdala kwendaka kuzabisa balonguki nde: "Mono me mona Mfumu Yesu!" Ebuna yandi telaka bo mambu yina ya Yesu tubilaka yandi."

5B. Kuyula bana bonso yai:

- Maria zolaka kusala inki?
(Kaka kusimba Yesu.)
- Inki Yesu songaka Yandi nde Yandi Yesu fweti sala diaka?
(Kutomba na Tata.)
- Inki kisalu Yesu pesaka Maria?
(Kukwenda na bampangi ya Yesu, kusonga bo nde Yandi ta tombuka na Tata.)
- Inki Maria kwendaka kusonga na balonguki?
(Mono me mona Mfumu Yesu!)
- Keti bo kwikilaka nswalu ndinga ya Maria?
(Ikele ve. Kansi yo vandaka kieleka.)

5C. Kusonga inki me salama:

Bana yonso tuba bonso Yesu tubaka na Maria:
"Kwenda songa bampangi na Mono!"

5D. Kuyimba ti kukina:

Yesu songaka Maria kusonga nde
Yandi me telama!
Yandi muntu ya ntete
Kusonga Ya' me telema!

Kumanisa leso:

Na luyantiku ya leso yai, beto yulaka keti kisalu ya kuzabisa nsangu ya Yesu ikele kaka sambu na babakala, to kana bankento mpi lenda sala yo. Ntangu yai, beto me mona nde muntu ya ntete kumona Yesu ya moyo na nima Yandi me fwa vandaka nkento, Maria ya Magdala. Yesu pesaka yandi mpi kisalu ya kukwenda kusonga bantu ya nkaka nde Yandi me telama. Kisalu ya kuzabisa nsangu ya Yesu ikele sambu na beto yonso bakristo!

Devoir sambu na bakristo:

Beno ya kele bakristo, kisalu ya kusonga nsangu ya mbote kele sambu na beno mpi. Yo yina, mono zola pesa beno devoir yai: Samba Nzambi kusonga nge muntu mosi ya ke na mfunu ya nsangu ya mbote, ebuna kwenda kusonga bo nsangu ya mbote kaka na mosi yai. Na mposo ke kwisa, mono ta yula kana nge me sala yo.

Beno bakala, kana nge me yela, lumbu mosi nge ta kwela. Yo kele mfunu mingi nde ata ntangu yai, nge zenga na ntima na nge, nde nge fweti kwela kaka nkento ya zola Yesu. Mpidina, beno ta vanda na mpila kusadila Nzambi sikamosi. Keti nge ta zenga mpidina bubuyai? Songa Yesu ntangu yai. (Longi, vanda na ntangu ya lombilu sambu na mambu yai.)

Kubinga bana na Yesu:

Mono me tuba yai na bana ya zaba Yesu. Kansi mbala ya nkaka, ata nge me kwisa na ecodim, kieleka nge me zaba Yesu ntete ve. Yandi ke kinga nge kubinga zina na Yandi sambu Yandi lenda gulusa nge. Keti nge ta yamba Yandi bubuyai? Kaka songa Yandi na ntima yonso nde nge me sala masumu mingi, kansi bubuyai nge zola yamba Yandi sambu Yandi kukota ntima ti luzingu na nge sesepiyai. Kana nge samba mpidina, kwisa na nima ya ecodim, ti songa mono sambu mono lenda yangalala ti nge.

====

NSUKA YA LESO 1

====

Leso 2. Bawanzio songa bankento tatu nde Yesu me telema, ti pesa bo kisalu kukwenda songa balonguki na Yandi.

Leso yai ke monika na Bible: Matayo 28:1-10, Marko 16:1-11, Luka 24:10

Kikuma ya leso: Tala Kikuma sambu na Serie yai ya Baleso.

Baverse ya kulonguka sambu na Serie yai ya Baleso: Matayo 28:5-7 Tala introduction ya baleso yai zole.

Bankunga: Tala Bankunga ya kwenda nzila mosi ti baleso yai.

Kulanda devoir ya mposo me luta:

Nani lenda songa beto devoir beto pesaka beno na mposo me luta? (Longi, pesa ntangu sambu bana kuvutula mvutu.) Ee, beto songaka beno kusamba Yandi nde Yandi kusonga nge muntu, ebuna nge zabisa yandi nsangu ya Yesu. Nani salaka yo? Nzambi songaka nge nani? Inki mutindu nge zabisaka yandi nsangu ya Yesu? Inki vandaka nsuka ya mambu yina?

Beto mpi songaka beno bana bakala kuzenga na ntima nde kana nge me yela, ntangu nge ta kwela, nge fweti bala kaka mukristo, muntu ya nkaka ve. Nani zengaka mutindu yina? (Longi, samba Nzambi nde bana ta bambuka ti ta landa mpila bo me zenga.)

Kuyantika leso:

Beto me mona nde Yesu songaka Maria ya Magdala kukwenda songa balonguki to bampangi na Yandi nde Yandi me telema ti Yandi ta tombuka na Tata na Yandi. Keti yo vandaka kaka nkento yai ya bakaka kisalu yina? Ikele ve! Bubuyai beto ta mona bankento tatu ya bakaka kisalu mpi kuzabisa nsangu ya Yesu. Bubuyai beto ke tanga na mukanda ya Matayo, kapu 28. Beto ta yika mpi ndambu detail ya ke monika ya Marko ti na Luka.

Mambu ya nene ya leso yai na bandambu 6 :

1. Bu bankento zole vandaka na nzila kukwisa na maziamu, wanzio kulumukaka na zulu ti katulaka ditadi ya vandaka kukanga munoko ya maziamu.

1A. Kutanga Matayo 28:1-3.

1 Na nima ya Kilumbu ya Kupema, na kilumbu ya lumingu na suka-suka, Maria ya Magdala ti Maria yina ya nkaka kwendaka kutala maziamu.

(NB: Marko 16: 1 yika nde yo vandaka Maria ya Magdala, Maria mama ya Yakobo, ti Salome. Yandi yika mpi nde bo sumbaka mananasi sambu na kwenda kutula yo na mvumbi ya Yesu. Yandi yika mpila bo vandaka kusolula na nzila nde, "Nani ta katudila beto ditadi yina kele na munoko ya maziamu?)

(NB: *Luka 24:10 tuba zina ya Salome ve kansi zina ya Yoana. Yo lenda vanda nde zina na yandi vandaka Salome Yoana to Yoane Salome, to zina vandaka Salome, kansi bantu vandaka kubinga yandi Yoane.*)

2 Nswalu, ntoto nikanaka ngolo; wanzio mosi ya Mfumu Nzambi katukaka na zulu, yandi kwisa kulumuka, yandi katula ditadi yina vandaka na munoko ya maziamu, ebuna yandi vanda na zulu ya ditadi.

3 Yandi vandaka kumonika bonso nzasi, bilele na yandi mpi vandaka mpembe mpenza,

1B. Yula bana bonso yai:

- Nani bankento yonso ya kwendaka na maziamu ya Yesu ya suka-suka?
(Maria Magdalena, Maria mama ya Yakobo, ti Salome)
- Bo yonso ikwa?
(Tatu)
- Bo sumbaka mananasi kusala inki?
(Kupakula yo na mvumbi ya Yesu)
- Na nzila bo vandaka kusolula inki?
(Nani ta katula bo ditadi ya vandaka kukanga munoko ya maziamu)
- Na ntwala bo kumaka na maziamu, inki salamaka?
(Ntoto nikanaka ti Nzambi tindaka wanzio na zulu kukatula ditadi ya kangaka munoko ya maziamu.)

1C. Kusonga inki me salama:

Bankento yonso sala bonso bo ke tambula nswalu, bonso bo ke sumba mananasi, bonso bo ke nata yo na maboko, bonso bo ke solula nani ta katula ditadi, bonso bo ke kwisa na maziamu, ebuna bo mona nde munoko kele ya kukanguka.

1D. Kuyimba ti kukina:

Bankento tatu kwendaka
na maziamu ya Yesu

Bo zabaka ve nani
Ta katula bo ditadi

Nzambi tindaka wanzio
Yandi katulaka yo!

2. Ntangu bo mona wanzio yina, basoda tatika, ti bo kumaka bonso bantu ya kufwa.

2A. Kutanga Matayo 28: 4

4 Ntangu basoda monaka yandi, bo yantikaka kutekita na boma mpenza, ebuna bo kumaka bonso bantu ya kufwa.

2B. Yula bana bonso yai:

- Basoda ya vandaka kutala maziamu sambu muntu kuyiba ve mvungi ya Yesu, ntangu bo monaka wanzio yina, bo salaka inki?
(Bo vandaka kutekita na boma, ebuna bo bwaka na ntoto bonso bantu ya kufwa.)

2C. Kusonga inki me salama:

Bana bakala yonso sala bonso basoda. Bo mona wanzio na lele ya mpembe, bo yantika kutetika na boma, ebuna bo kubwa na ntoto bonso muntu ya kufwa ya zaba kima ve.

2D. Kuyimba tu kukina:

Basoda mona wanzio
Ti bo kutetika
Boma kusimba yo
Yo losa bo na ntoto
Bonso bantu ya kufwa.

3. Wanzio songaka nde Yesu me telema ti pesaka bo kisalu kukwenda kusonga yo.

3A. Kutanga Matayo 28:5-7

5 Wanzio tubilaka bankento nde; “Beno kuwa boma ve, sambu mono zaba nde beno ke sosa Yesu yina ya bo tulaka na zulu ya kulunsi.

6 Yandi kele awa ve, Nzambi me tedimisa Yandi na lufwa mutindu Yandi tubaka. Beno kwisa kutala kisika ya Yandi vandaka kulala.

7 Beno kwenda kuzabisa balonguki na Yandi nde: ‘Nzambi me tedimisa Yandi na lufwa, ebuna ntangu yai, Yandi me yita beno na Galilea; beno ta mona Yandi kunal!’ Yai kele mambu ya mono vandaka na yo sambu na kutubila beno.”

3B. Kuyula bana:

- Wanzio tubaka na banani?

(Na bankento ya kwisaka na maziamu kupakula mvumbi ya Yesu—Maria ya Magdala, Maria mama ya Yakobo, ti Salome)

- Wanzio songaka bo inki sambu na Yesu?
(Nzambi me tedimisa Yandi na lufwa.)
- Wanzio songaka bo nde Yesu me kwenda wapi?
(Yandi me yita bo na Galile, ebuna bo ta kuta Yandi kuna.)

3C. Kusonga inki me salama:

Mwana mosi sala bonso wanzio kusonga inki wanzio tubilaka bankento.

3D. Kuyimba ti kukina:

‘Nzambi me tedimisa Yesu na lufwa,’

Wanzio tubaka.

4. Bo kwendaka nswalu kuzabisa nsangu ya kutelama ya Yesu.

4A. Kutanga Matayo 28:8

8 Ebuna bo katukaka nswalu na maziamu; bo vandaka na boma, kansi bo vandaka na kiese mingi mpi. Bo kwendaka nswalu sambu na kuzabisa nsangu yina na balonguki na Yandi.

4B. Kuyula bana bonso yai:

- Inki emotion zole bankento monaka na ntima na bo na nima wanzio me songa bo nde Nzambi me tedimisa Yesu na lufwa?
(Bo waka boma ti kiese mingi mpi.)
- Nswalu, bo salaka inki?
(Bo kwendaka sambu na kuzabisa nsangu yina na balonguki na Yandi.)

4C. Kusonga inki me salama:

Bana yonso baka ntinu kukwenda kuzabisa nsangu nde Yesu me telama na balonguki. (Kana bana kele mingi, bo sala bageste sur place bonso bo ke kwenda, kansi bo kwenda ve.)

4D. Kuyimba ti kukina:

Bankento kwenda nswalu

Kusonga nsangu ya Yesu.

5. Na nzila, Yesu monikaka na bo.

5A. Kutanga Matayo 28:9

9 Na mbala mosi, Yesu kwisaka kukuta bo; Yandi tubilaka bo nde “Mbote na beno.” Bankento yango kwisaka kuplesana penepene na Yandi, bo simbaka makulu na Yandi, ebuna bo sambaka Yandi.

5B. Yula bonso yai:

- Nani kutaka bo na nzila?
(Yesu Yandi mosi kutaka bo.)
- Bo zolaka kusala inki na Yandi?
(Bo zolaka kusimba makulu na Yandi ti kusamba Yandi.)
- Inki nge banza lenda vanda probleme kusimba makulu na Yandi?
(Yandi fweti tombuka na Tata, kansi bo ke simba makulu bonso bo zola kukanga Yandi kuna sikamosi ti bo.)

5C. Kusonga inki me salama:

Mwana mosi sala bonso yandi kele Yesu. Yandi tuba, “Mbote na beno.” Ebuna bana yonso meka kusimba makulu na yandi ti bo sala bonso bo ke samba yandi.

5D. Kuyimba ti kukina:

Na nzila, Yandi Kutaka bo.
Bo monaka Yandi ya moyo!

6. Yesu mpi pesaka bo kisalu kusonga bantu ya nkaka.

6A. Kutanga Matayo 28:10.

10 Ntangu yai, Yesu tubilaka bo nde: “Beno kuwa boma ve. Beno kwenda kuzabisa bampangi na Mono nde bo kwenda na Galilea; bo ta mona Mono kuna.”

6B. Yula bana bonso yai:

- Yesu songaka bo inki?

(Beno kuwa boma ve. Beno kwenda kuzabisa bampangi na Mono nde bo kwenda na Galilea, ebuna bo ta kuta Yesu kuna.)

- Yesu ta kutana ti bo wapi?
(Na Galilea.)

6C. Kusonga inki me salama:

Bana yonso landa nge na kutuba ya Yesu phrase par phrase:

Longi: Beno kuwa boma ve. (Bana repeter.)

Longi: Beno kwenda kuzabisa bampangi na mono (Bana repeter.)

Longi: nde bo kwenda na Galilea; (Bana repeter.)

Longi: bo ta mona mono kuna. (Bana repeter.)

Longi: Yesu me tuba yo! (Bana repeter.)

6D. Yimba ti kukina:

Yesu ta kuta bo na Galilea! (Yimba diaka ti diaka ti songa diboko kusonga Galilea.)

Kumanisa leso:

Wanzio songaka bankento yai kuzabisa nsangu ya Yesu, ti Yesu Yandi mosi tubilaka bo kiteso mosi. Yandi me telema na lufwa. Nsangu yai bo zabisaka ntete na balonguki na Yandi, kansi na ntwala Yesu tombukaka na Tata na Yandi, Yandi songaka bo kuzabisa nsangu na Yandi na bantu yonso mpi na bisika yonso (Bisalu 1:8). Kisalu yai kele sambu na bankento ti sambu na babakala mpi. Yo kele kisalu ya beto yonso bakristo.

Devoir sambu na bakristo:

Beno bakristo, beno ya zaba Yesu dezia bonso Mvulusi, mono ke pesa beno devoir kiteso mosi bonso bawanzio pesaka, bonso Yesu Yandi mosi pesaka. Mposo yai, kwenda kuzabisa mpangi mosi nde Yesu me telama. Ti beno yonso, zenga na ntima nde ntangu nge kwela, nge ta sosa kaka muntu ya kele mukristo. Kana fami ke sosa nani nge ta kwela, nge ta songa bo nde, "Beno sosa kaka mukristo ya mbote." Mambu yai ta pesa Yesu kiese.

Kubinga bana kutula ntima na Yesu:

Na kati na beno, mbala ya nge bana ya nkaka me zaba Yesu ntete ve. Mbala ya nkaka nge bakisa nde Yandi kele Mwana-Nzambi. Kansi nge me binga Yandi ntete ve sambu Yandi kulolula nge ti Yandi kukitula nge mukristo. Yandi me fwaka sambu na masumu na nge ti Yandi me telama na lufwa. Yandi ta yamba nge na fami na Yandi kana nge ta kaka yamba Yandi. Nge lenda binga Yandi kuvulusa nge. Yandi ta yamba nge sesepiyai ti nge ta kuma mwana ya Nzambi. Kana nge ke na mfunu ya lusadisu na mambu yina, kaka bikala na nima ya ecodim sambu beto lenda sadisa nge.

====

NSUKA YA LESO 2 TI NSUKA YA BALESO YONSO 2

====

NB: Atasio, longi!

Ntangu yai, nge me manisa kusadila baleso yai. Baleso ya mpa ke kinga nge na Centre des Materiels, sika nge me defa baleso yai. Mabundu ya nkaka mpi ke kinga kudefa baleso yai sambu bo mona mpila kulonga bana na bo. Ntangu yai, vutula materiels yonso na sachet ti vutula yonso na Centre des Materiels ya MCE. Merci mingi sambu na collaboration ya nge !